



L'hotelier Martin Scherrer (a san.) cun cusseglier guvernativ Marcus Caduff.

FOTOS G. N. STGIER



Cusseglier guvernativ Peter Peyer (a san.) cun Giordano Crameri.



Il president communal da Landquart Sepp Föhn, la deputada Sandra Locher Benguerel ed il president da vischnanca da San Murezzan Christian Jott Jenny (da san.).

In di porta quel inscunter segir fritgs

Cussegel grond: Inscunter cun la populaziun

DA GION NUTEGN STGIER / ANR

■ Ina rotscha indigens è vegnida a l'entupda cun ils commembers e las commembras dal cussegel grond mesemna saira a Puntraschigna. Ils Engiadinais èn sa mussads loschs ch'il parlament grischun è stà en il lieu turistic per la sessiun extra muros. Fin vers las 16.00 na sa mussava l'Engiadin'Ota in-summa betg da sia meglra vart, cun esser bletsch e grisch. Duas uras pli tard èsi vegnì bel, uschia che la culissa na vess betg savì esser pli magnifica sin la terrassa da l'hotel Saratz cun la vista grondiusa sin las «Trais Fluors» e sias muntognas vischinas. Ina saira plain traglischur er grazia a l'atmosfera amiaivla tranter la

populaziun da Puntraschigna ed ils commembers e las commembras dal cussegel grond.

Numerus presidents comunals

In invit personal avevan retschet ils umens e las dunnas da las autoritads da las vischnancas vischinas da Puntraschigna. Per ils presidents comunals cun lur suprastants ina bun'ocasiun per pudair deponer tar la regenza e tar ils deputads e las deputadas lur giavischs e desideris. Quai han lura er blers presidents da vischnanca nizzegià. Ils commembers da la regenza ed er tut las autras persunas han er prendì bler temp per la populaziun ed er per ils umens e las dunnas da

las executivas da Samedan, San Murezzan, Silvaplana, Bever e S-chanf.

Blera atenziun per Christian Jott Jenny

Da preschent il star tranter ils presidents comunals è segir *Christian Jott Jenny*, el ch'è dapi l'entschatta da l'onn a la testa da la vischnanca da San Murezzan. Cun sia preschientscha ha il «entertainer» lura er procurà per blera atenziun e quai na be tar las medias, mabain er tar ils 120 deputads e deputadas. Er el è sa mussà cuntent dalla visita dal cussegel grond en l'Engiadin'Ota. Tranter las bleras intervistas e termins da foto ha Jenny tuttina anc chattà temp per far in discurs cun noss regents ed er cun tuts ils auters represchentants dal parlament grischun.

Barats tranter presidents comunals

Dals deputads e da las deputadas è er ina buna part en ina suprastanza da vischnanca e numerus èn schizunt er presidents comunals. Uschia è er vegnì discurrì da politica locala, dals problems e quists da mintga vischnanca e bler auter vitiers. Magari han gist dus presidents comunals tschertgà comunabel il discurs cun ils tschintg cussegliers guvernativs, cunzunt tar temas regionalis. La vischnanca da Puntraschigna cun ses president dal lieu ed ospitant *Martin Aebli* è stada fitg generusa. Ils numerus giasts da l'entir chantun han en tutta cas sa laschà ir bain durant la saira cun buns discurs ed inscunters che vegnan segir er a portar ils fritgs duaivels.



Dus hoteliers ed il president da la plid: Thomas Walther, Christian Walther e Bruno Claus (da san.).



Tarzius Caviezel, il landamma da Tavau, cun Nora Saratz.



Turissim e politica: Gerhard Walter, directur turistic San Murezzan, e la deputada Andrea Thür.



Las duas deputadas Cornelia Märchy, Gaby Ulber, dus giasts ed il deputà Erich Kohler (da san.).



Gian Fadri Largiadèr (a san.), il president communal da S-chanf, cun il deputà Bruno Loi.